

Lokalne vlasti najavljuju tužbu protiv Federalnog ministarstva koje izdaje okolišnu dozvolu kompaniji Arcelor Mittal.

Zagađenost zraka u Zenici već godinama premašuje dozvoljeni nivo. Lokalna vlast najavljuje tužbu protiv Federalnog ministarstva okoliša i turizma, zbog izdavanja okolišne dozvole kompaniji Arcelor Mittal Zenica, najvećem proizvođaču čelika u svijetu.

U međuvremenu, stručnjaci upozoravaju na vezu između zagađenosti zraka i broja oboljelih Zeničana.

Nekoliko aktivnih dimnjaka kompanije Arcelor Mittal periodično ispuštaju žuti dim zbog kojeg su mještani obližnjeg naselja Tetovo posebno zabrinuti.

Aleksandar kaže da se već četiri godine liječi, ima respiratorne probleme za koje sumnja da su uzrokovane zagađenim zrakom.

„Imam hroničnu upalu pluća, sarkoidozu i hronični bronhitis“, kazao je Aleksandar Jakšić, mještanin naselja Tetovo.

U naselju je i osnovna škola. Za razliku od bezbrižne djece, njihovi roditelji su uplašeni.

Amra Ahmetagić kaže da njena kćerka sve učestalije mora ljekaru.

„Imala je alergiju koja je trajala šest mjeseci. Ja sumnjam da je to sve od zraka“, rekla je Ahmetagić.

Direktan utjecaj na zdravlje

Podaci o direktnom utjecaju zagađenosti zraka na zdravlje Zeničana ne postoje, ali postoje analize.

Prema jednoj, kad god se poveća zagađenost zraka u gradu, u istom periodu poveća se i broj propisanih terapija za djecu. Doktor Harun Drljević iz nevladine organizacije Eko forum kaže da su posljedice ozbiljne i kod starijeg stanovništva.

„Porast zloćudnih oboljenja evidentno postoji, ali ne znamo još uvijek tačno koliko su vezana za efekte zagađenja“, kaže Drljević.

Količina sumpordioksida u zraku u Zenici je, prema godišnjem prosjeku, dva i po puta veća od dozvoljene.

Lokalne vlasti najavljuju tužbu protiv Federalnog ministarstva koje izdaje okolišnu dozvolu kompaniji Arcelor Mittal. Profesor Šefket Goletić, koji ih zastupa, kaže da traže izdavanje dozvole za sve pogone Mittala ili da se izdaju godišnje sa stručnim mišljenjem i planovima.

„Jedno od mogućih rješenja: ako je jeftinije postići kvalitetniji zrak rješavanjem lokalnih kotlovnica, ukidanjem uglja kao energenta u domaćinstvima i lokalnim kotlovnica, onda hajdemo svi da to finansiramo. Kad kažem svi, tu podrazumijevam da u tome treba da participira i kompanija Arcelor Mittal, jer njoj je cilj da poboljša kvalitet zraka“, rekao je Šefket Goletića Katedre za inženjerstvo Univerziteta Zenica.

Spremnost na saradnju

U kompaniji Arcelor Mittal kažu da su spremni na saradnju, ali da gradska uprava treba definisati strategiju za grijanje grada. Dodaju da su na vrijeme podnijeli zahtjev za izdavanje okolišnih dozvola za sedam pogona, ali da ih još čekaju.

„Ono što je bitno napomenuti jeste da je neizvjesnost u nemanju, neizdavanju novih okolišnih dozvola jedna prepreka kompaniji da pravi odgovarajuću svoju strategiju za budućnost“, navela je Mirsa Tuce, direktorica za odnose s državnim institucijama Arcelor Mittala Zenica.

„Iz Federalnog ministarstva okoliša i turizma nisu mogli komentarisati najavu lokalnih vlasti Zenice da će ih tužiti zbog izdavanja okolišnih dozvola kompaniji Arcelor Mittal. Kažu da je službenik koji je radio na izdavanju tih dozvola u međuvremenu penzionisan, te da će njegove kolege biti upoznate s detaljima dozvole narednih dana“, javlja reporter Al Jazeera Emir Skenderagić.

Iz Arcelor Mittala podsjećaju da su do sada uložili više od 45 miliona eura u projekte definisane okolišnim dozvolama, te još 10 miliona samoinicijativno. Investicije koje znače radna mjesta s jedne i zagađeni zrak s druge strane, stavljaju Zeničane uvijek pred istu dilemu. Pomoć u njenom razrješenju, sada očekuju s entitetskog nivoa.

izvor: aljazeera.balkans.com